

25/10/1998

Seludup: Kastam tingkat kuatkuasa

Nadzim Ahmad Jamalludin

JOHOR BAHRU: Jabatan Kastam dan Eksais Diraja akan meningkatkan penguatkuasaan dan merangka strategi lebih berkesan untuk menangani penyeludupan rokok dan arak yang dijangka meningkat berikutan kenaikan duti import dan eksais tembakau dan arak.

Timbalan Ketua Pengarah Kastam (Pelaksanaan), Madehi Kolek, bagaimanapun yakin kawalan dan rondaan di sepanjang pantai perairan negara ini, dapat mengatasi masalah itu.

"Kita percaya sentiasa berhadapan dengan pihak yang akan melarikan cukai.

"Dengan kenaikan ini kita terpaksa berusaha lebih lagi.

"Kita kena merancang supaya dapat memberi kesan kepada hasrat menaikkan cukai rokok dan sebagainya," katanya selepas melancarkan Piagam Agen Penghantaran/Perkapalan dan merasmikan Bilik Rujukan Bistari di Kompleks Kastam Tanjung Puteri di sini, semalam.

Beliau mengulas persediaan Jabatan Kastam dan Eksais Diraja bagi menangani kemungkinan peningkatan penyeludupan rokok dan arak berikutan kenaikan duti import dan eksais tembakau dan arak yang diumumkan dalam Belanjawan 1999 kelmarin.

Perdana Menteri, Datuk Seri Dr Mahathir Mohamad yang juga Menteri Kewangan Pertama ketika membentangkan Belanjawan 1999 di Parlimen kelmarin, berkata duti import ke atas rokok dan keluaran tembakau lain, masing-masing dinaikkan dari RM139 sekilogram dan RM162 sekilogram kepada RM180 sekilogram.

Sementara itu, duti eksais bagi rokok yang dikilangkan dalam negara dinaikkan dari RM28.60 sekilogram kepada RM40 sekilogram.

Selain rokok, duti import dan eksais ke atas semua jenis minuman keras juga dinaikkan 20 peratus daripada kadar semasa.

Kenaikan itu antara usaha menggalakkan hidup sihat dan mengurangkan gejala sosial.

Mengenai peraturan larangan membawa keluar dari semua pintu keluar negara ini empat barangan keperluan yang diumumkan baru-baru ini, Madehi berkata, setakat ini, penguatkuasaan terhadap larangan membawa keluar minyak masak dan gula sudah dilaksanakan.

Menurutnya, penguatkuasaan terhadap larangan membawa keluar susu pekat manis dan tepung gandum yang diumumkan 22 Oktober lalu, akan dilaksanakan apabila pekeliling mengenainya diterima.

(END)